

Uunga siunnersuut:

**Kalaallit Nunaata Aatsitassarsiornermi Aningaasaateqarfia pillugu Inatsisartut
Inatsisaata allanngortinneqarnera pillugu Inatsisartut Inatsisaat**
(Utaqqisaannaagallartumik naatsorsuutitigut teknikikkut aningaasaateqarfittut
aqutsigallarnissaq)

§ 1

Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaanni nr. 6, 5. december 2008-meersumi, Inatsisartut inatsisaanni nr. 25, 9. december 2015-imeersukkut, Inatsisartut inatsisaanni nr. 31, 28. december 2016-imeersukkut kingornalu Inatsisartut inatsisaanni nr. 49, 23 november 2017-imeersukkut allanngortinneqartumi, makku allanngortinneqassapput:

1. § 6, imm. 8 ima allanneqassaaq

”Imm. 8. Nunatta Karsiata aamma aningaasaateqarfiup akornanni aningaasanik nuussineq kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaat kisimi naapertorlugu pisinnaavoq.”

2. §§ 51-52 ima oqaasertalerneqassaaq:

”§ 51. Ukioq ilivitsumi piumasaqaatit naammassineqarnissaasa tungaanut, aningaasaateqarfik Naalakkersuisunit aqunneqassaaq:

- 1) Aningaasaateqarfiup aningaasaataasa 1 milliard kr.-t annertunerulernissaannut.
- 2) Aningaasaateqarfiup aningaasaataanit ukiumut iluanaarutisiat 50 million kr.-t annertunerulernissaannut.

Imm. 2. Naalakkersuisut aningaasaateqarfirmik aqutsinerat ukiumi piumasaqaatit tamarmik naammassineqarneranni ulloq 31. december kingorna atorunnaassaaq.

Imm. 3. Naalakkersuisut aningaasaateqarfiup aningaasaataanik ingerlatsisunik ataatsimik amerlanernilluunniit toqqaassapput.

Imm. 4. Naalakkersuisut aqutsinerisa atorunnaarnissaata tungaanut, § 1, imm. 2-3, § 6, imm. 7, § 7, imm. 4, uniffiit pingajuat, § 8, § 9, §§ 11-27, § 28, imm. 1, §§ 31-41, § 43, §§ 45-48 aamma § 49, nr. 1-13 aamma 18-24 aalajangersakkat atuutissanngillat.

§ 52. ”Naalakkersuisut aningaasaateqarfik siulersorlugu aqussavaat.

Imm. 2. Naatsorsuutini teknikikkut aningaasaateqarfiup aqunneqarnera aningaasanillu inissiineq ima pissasoq Naalakkersuisut isumannaassavaat:

- 1) Toqqissisimanartumik isumannaatsuunissaq annertunerpaamillu iluanaaruteqarnissaq anguniarlugu,
- 2) aningaasaatinik aqutsinermi aningaasaliisarnernilu nunat tamalaat akornanni pitsaasumik periutsit naapertorlugit, aamma
- 3) ileqqorissaarnikkut malitassiat toqqissisimanartut naapertorlugit.

Imm. 3. Aningaasaateqarfiup ingerlanneqarneranut ineriartorneranullu sunniuteqarsinnaasutut paasissutissat nalilerneqartut pillugit nalunaarutininik ukiumoortumik Naalakkersuisut saqqummiussisassapput.”

§ 2

Inatsisartut inatsisaat 1. januar 2022-mi atuutilissaaq.

Namminersorlutik Oqartussat, ulloq xx. xxx 2021

Naalakkersuisut Siulittaasuat